



# KHUTBA JUMMAH

HAZRAT MUHYI-UD-DIN AL-KHALIFATULLAH  
*Munir Ahmad Azim*

02 Octobre 2015 ~  
(18 Dhul-Hijjah 1436 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors dernier partie so Khutba ki li ti commencé des semaines avant lors « **sacrifier ou propre confort pour les autres** »:

هَذَا بَصِيرَةٌ لِلنَّاسِ وَهُدًى وَرَحْمَةٌ لِقَوْمٍ يُوقِنُونَ ﴿١٩﴾ أَمْ حَسِبَ الَّذِينَ اجْتَرَحُوا السَّيِّئَاتِ أَنْ  
يَجْعَلَهُمْ كَالَّذِينَ آمَنُوا وَعَمِلُوا الصَّالِحَاتِ سَوَاءً مَحْيَاهُمْ وَمَمَاتُهُمْ سَاءَ مَا يَحْكُمُونَ ﴿٢٠﴾  
وَخَلَقَ اللَّهُ السَّمَوَاتِ وَالْأَرْضَ بِالْحَقِّ وَلِتُجْزَىٰ كُلُّ نَفْسٍ بِمَا كَسَبَتْ وَهُمْ لَا يُظْلَمُونَ ﴿٢١﴾

Haazaa basaaa-'iru linnaasi wa hudaww-wa Rahmatul-li-qawmiyy-yuuqinuun. 'Am hasiballazii-najtarahus-sayyi-'aati 'an-naj-'alahum kallaziina 'aamanuu wa 'amilus-saalihaati, sawaaa-'am-mahyaahum wa mamaatuhum ? Saaa-'a maa yah-kumuun. Wa khalaqallaahus-samaawaati-wal-'arza bil haqqi wa litujzaa kullu nafsim-bimaa kasabat wa hum laa yuzlamuun.

« Sa li ene illumination pour dimounes, ene guide et ene grâce pou dimounes avec conviction. Eski bane ki commette de mauvaises actions pensé ki Nous pou traite zot pareil couma bane ki ena la foi et faire de bonnes actions, ki zot la vie et zot la mort pou pareil ? Couma zot juge mal! Allah fine crée bane les ciels et la terre en toute vérité, pou récompense sak l'âme d'après séki li mériter et aucaine injustice pas pou faire zot. » (Surah Al Jathiya 45: 21-23)

Par la grâce d'Allah, Allah (swt) donne moi sa *Tawfiq* là pou continué mo explication de sujet de mo 3 Khutba Jummah ki mo fine faire dans mois de *Dhul-Qaddah* (c'est-à-dire, 28 Août, et 04 & 11 Septembre 2015).

Li tellement ene sujet important et li bien vaste et mo souhaite ki par la grâce d'Allah, sak musulman à travers le monde entier et tous mo banes chers disciples ki trouve dans différent pays du monde comprend céki mo pé faire zot comprend pou zot propre l'intérêt, pou zot propre dibien vis-à-vis zot Créateur et essaye analyse céki mo fine dire dans mo banes Khutba Jummah kot azordi faire 4<sup>ème</sup> partie de sa Khutba Jummah là. C'est pou ou propre bénéfice si sakaine arriver reforme li-même, li pas pou ena aucaine l'angoisse le jour kan li ena pou présent li devant so Créateur. Donc, si sak dimoune comprend bien céki mo pé dire zot, bé tout dimounes bizin efface zot bane discussions, zot bane passions, la haine et rancunes ki zot ena pou zot bane frères de même religion ki zot et bane la guerre ki ena entre zot.

La majorité de bane dimounes ki engager dans bane la guerre entre zot-même et zot pas faire aucaine zéfforts pou calmer zot bane colère et zot passion, c'est bane dimoune ki pas capave rentre parmi bane camarades d'Allah. Donc, mo faire ene l'appel à zot tous sans distinction ki maintenant li grand temps pou délaisse et abandonne bane tipti zaffaires ki pas ena l'importance (bane différences et disputes inutiles) et maintenant c'est l'heure ki nous engage nous dans bane grand, grand travail extraordinaire (de la religion). Donc sak fois mo pé faire ou comprend et mo pou continuer faire ou comprend ki li absolument nécessaire ki nous adopter sa bane zaffaires là, et sans sa nous pas pou capave vine sous l'ombre d'Allah, sous le refuge d'Allah en paix.

Mais l'objectif li pas seulement pou vine sous le refuge d'Allah en paix. Ene vrai z'homme c'est celui ki saute dans le terrain à ene moment kot apparemment péna aucaine support, mais la aussi li sauter. Tout céki li ena, tout céki li capave li présenté et li pas prend aucaine conte ki arriver par derrière (li guette zis devant li). Parceki so passion et l'amour et désire pou servir la religion li tellement fort dans so le cœur, ki volontairement li présente li avec tout céki li ena au service de la religion. Si ou fine fini crée sa bane qualités désire là dans ou lé cœur, bé à ce moment là c'est ou sa bane dimounes ki vine sous l'ombre, sous refuge d'Allah en paix. Mais jusqu'à l'heure ou pas encore développe ene tel passion ; ene tel passion ki couma ene la braize ki à n'importe ki moment capave crée ene bél la flamme (de dévotion). Alors, si ou pas encore arrive à ce point là (à sa idéale là), bé à ce moment là tout sa bane paroles là pou bane tél paroles ki ou pou capave comprend, oui, mais ou pas pou capave tire profit de sa. Donc, li grand temps ki sakaine réfléchi et analyse so propre être d'ene tel façon, en détails, de sorte ki aucaine aspé de so propre être pas reste dans l'obscurité.

Pense bien ki tous bane dimounes ki sous l'emprise de zot colère, ki zot colère et passion domine zot, bé li pas possible ki bane paroles de sagesse et de connaissance sortie de zot la bouche. Ena boucou dimounes écrire moi lettres, ena envoyé par Emails pou dire faire *duah* pou zot, mais couma mo commence faire *duah* pou zot, *duah* même pou zot pas sorti et toute suite mo comprend ki zot pas fine adopter bane chemins ki Allah oulé de zot. Donc, zot direction li différent de bane direction ki nous, nous adopter. Si ou laisse ou dominer par ou bane désires et passion et colère, bé li pas possible ki bane paroles de connaissance et de sagesse sorti de ou la bouche, et bane dimounes ki fine vine sous le refuge d'Allah pas capave même supplier Allah en zot faveur, parce ki c'est Allah même ki empêche So bane serviteurs pou prier pour bane dimounes pareils. A ce moment là sa zaffaire kot ou pou gagne le dessus lors bane grand, grand savants là li ene zaffaire bien loin.

Donc, si ou colère, ou passion gagne le dessus lors ou, bé li pas possible ki ou accompli sa désire de vine bane camarades d'Allah. Donc pou vine bane camarades Allah, zamais pas déclarer ki « *C'est à cause de mo bane connaissance ki mo fine vine ene grand dimoune.* » Si ou flatte ou connaissance, kot ou ena bon mémoire, ou ena bél statut dans ou travail, et ki au niveau public en général ou pé montré ou l'arrogance, ou égoïsme, alors sa pou grave. Pas déclare ou plus supérieur. Au contraire montré ou ene dimoune ki pli humble, ki remplie d'humilité. Avant les autres faire ou *Salaam*, ou faire le *Salaam* avant avec tous respect et humilité, pas mette boycotte lors personne et pas garde rancune avec n'importe ki sanlà. Vine bane dimounes humble ki tous céki ou fine gagner, tel ki connaissance, sagesse etc. vine de Allah seul et toujours avec boucou de humilité et sincérité faire sa *duah* là : « **O Allah! Faire nous vine pou Toi** ». Kan ou vine pou Allah, bé à ce moment là le sujet de sa *duah* ki Hazrat Moosa (as) ti faire là, commencé : « **Rabbi inni lima anzalta ilayya min khayrin fakir** ». – *O Allah mo dans ene grand besoin de tout faveur ki To capave faire moi. (Ameen).*

Laisse tous lors Allah ; Allah ki pou décider ki, ki capacité dans ou bizin développer et jusqu'à ki limite li pou arriver. Laisse sa lors Li-même. Et bane plantes ki Allah protéger ; la raison ki Li protège zot, c'est ki justement sans Li, bane plantes là pas capave arrive à zot maximum capacité. C'est la main d'Allah ki sape zot de bane *Ghayr* (non-croyants), de bane zaffaire étrangers et Allah crée ene tel environnement de sorte ki banes plantes là arrive à zot maximum capacités. Bane bon paroles et paroles de sagesse et de connaissance pas capave sorti de la bouche de bane tel dimounes ki contre Allah et So bane commandements, et ki refuse vine bane bons plantes. Au contraire, sak parole de bane tél dimounes li ene source de désordres. Effectivement quand ou guette la caze de bane dimounes ki laisse zot dominé par zot colère, ou pou trouver ki ena désordres même dans zot environnement, dans zot société pou ena désordres, dans zot bane relation avec les autres pou ena désordres. Partout zot faire désordre même. Donc, si ou envie causer avec l'aide de l'esprit saint, parceki vrai connaissance c'est celle ki gagner de l'esprit saint, bé ou bizin retire tout banes désires et passion et colère personnel dans ou. C'est à ce moment là ki bane parole de connaissance pou sorti de ou la bouche et lirlà lé ciel pou prend ou comme ene dimoune profitable pou le monde.

Mo faire boucou duahs ki dans le Jamaat Ul Sahih Al Islam personne pas ridiculise, pas cause mauvais, ou faire joke lors so frère. Li ene tel mauvais kitchose sa si ene pé abaisse ene l'autre et faire so lé cœur faire mal, et pé tire bane mauvais de sa dimoune là pé expose sa. Li bien grave sa devant lizié d'Allah et so punition de côté d'Allah bien terrible. Mette en pratique la bonté, cause de bon pou ou prochain ; ene bon sense de l'humour li tout à fait permette. Ene dimoune conné si li pou causé li capave cause bane imbécilités, alors pli au moins li reste tranquille. Garde le silence, ou capave évite boucou dérapage, désordre, la guerre.

Donc sense de l'humour c'est ene très haute qualité. Mo faire sa *duah* là et termine sa Khutba là ici : ki sak membre Jamaat Ul Sahih Al Islam cultive sa sense de l'humour là ki ene très haute qualité et faire vine en paix sous l'ombre, le refuge d'Allah et vine bane camarade d'Allah et servi la religion d'Allah avec lé cœurs pures et sincères, *Insha-Allah, Ameen.*